

Memorandum za obnovu zgrade Suda **Za rekonstrukciju objekta potrebno 3,2 miliona eura**

U zgradi Kantonalnog suda u Sarajevu jučer je potpisan memorandum za obnovu zgrade Suda u kojoj su smješteni Kantonalni i Općinski sud Centra, a za rekonstrukciju je potrebno 3,25 miliona eura. Memorandum je potpisan između Ministarstva pravde BiH, delegacije Evropske komisije u BiH, vlade Kraljevine Norveške, Visokog sudskog i tužilačkog vijeća, Ministarstva pravde i uprave Kantona Sarajevo, te Kantonalnog i Općinskog suda.

Evropska unija je izdvojila sredstva od 1.720.000 eura za obnovu zgrade Suda, dok je za pripremu projekta vlada Kraljevine Norveške obezbijedila 90 hiljada eura, a Vlada KS 800 hiljada maraka za sufinansiranje radova.

“Zgrada Suda je jedan od objekata koji je bitan za građane, jer u njemu mogu ostvariti svoja prava. Cilj nam je da se obnove sve sudske zgrade u BiH, jer je sve i jednoj neophodna obnova, a za to su već uslijedili pregovori

oko donacija”, istakao je Bariša Čolak, ministar pravde BiH.

Sam cilj projekta je povećanje kapaciteta ovih sudova kako bi se pravda za građane blagovremeno provodila. Prema riječima Branke Perića, predsjednika Visokog sudskog i tužilačkog vijeća BiH, za državu je ovo historijski dan koji je od ključnog značaja i uspostavljanja demokratije.

“Sud ima osam sudija i jednu sudnicu, što je loše za njihovu profesiju i za pravdu. Potpisivanje memoranduma je ključni korak u sticanju povjerenja građana Sarajeva i BiH”, tvrdi Perić.

Ukoliko budu obezbijedena sva potrebna sredstva u iznosu od 3,25 miliona eura, rekonstrukcija zajedničke zgrade Općinskog i Kantonalnog suda u Sarajevu trebala bi početi u drugoj polovini 2007. godine nakon što Evropska komisija putem tendera odabere najboljeg ponuđača koji će izvesti radove na zgradi.

L. JAKUPOVIĆ